

# Lis contis di un mulinâr mistic



Un vecjo mulin

La sapience populâr di **Giuseppe Piccini** a continue a vivi tune opare, curade di **Stefano Morandini**, studiôs di antropologjie e publicade de Societât filologjiche furlane.

» DI **CHRISTIAN ROMANINI**

Si sa che in Friûl a son “i bogns, i triscj e chei di Nimis”. Une detule che a jentre ad implen tra chês tantis che a representin il patrimoni che i studiôs a definissin imateriâl, cun dute la lôr fuarce che e ven de savietât di popul. Esponent a ducj i efjets de tierce “categorie” al è **Giuseppe Piccini**, che a Nimis a cognossevin par ‘Sef Mulinâr.

Mancjât tai Agns '90 vuê ‘Sef e la sò sapience populâr a continuin a vivi tune opare publicade de Societât Filologjiche Furlane cu la poie dal Comun di Nimis, ma soredu grazie ae intuizion di pre **Rizieri De Tina** e pre **Luigi Gloazzo** che dopo dal taramot dal 1976 a àn vude maniere di dâ

a ‘Sef un spazi, o miôr un “cjantonut” par esprimisi par radio e regjistrâlu.

## TRASMISSION STORICHE

Al nasseve cussì il “Font ‘Sef” cirche 36 oris di transmissions regjistradis tra i Agns '80 e i prins Agns '90 par Radio Effe international (Effe al sta par Friûl) e che, dopo jessi stadis conservadis te canoniche di Nimis par mert di pre Rizieri, i son rivadis a **Stefano Morandini**, studiôs specializât in antropologjie documentaristiche e visuâl, tradizions populârs e antropologjie museâl, che al à curade la trascrizion e la publicazion che e cjape dentri une selezion di

dut chest materiâl, ancje grazie a **Elena Zanussi** che e à analizât lis particolaritâts linguistichis de lenghe furlane di Nimis.

## UN OM VISIONARI

“Visionari” lu definìs Morandini, ma e somee plui juste la definizion di pre Rizieri che par ‘Sef Mulinâr al dopre la peraule “mistic”, par vie de naturâl vision dal mont ispirade dal Signôr e che “come une rose di cjamp” cun genuinitât al cjale ce che i sucêt ator di se. Cheste fuarce e jere vignude fûr tai incuintri dal Vanzeli, un apontament che pre Rizieri e pre Luigi, “zovins predis di confin” come che ju clame Morandini, a organizavin a Nimis par tignî dongje la int, intune sorte di teologie dal popul. In chestis ocasions ‘Sef al veve vude maniere di condividi cheste sò sapience populâr che i vignive ancje dal mistîr di mulinâr ereditât di so pari.

Il valôr di chestis contis, puartadis su lis pagjinis di chest libri, ma ancje proponudis intun cd zontât ae publicazion, al ven fûr tes peraulis di pre Rizieri che al comentè “Tai cjantonuts, ma soredu tes riflessions che al faseve tal grop dal Vanzeli, ‘Sef a mi mi à dade la sigurece: che la nestre int e je viodude ben dal Signôr; che la spiritualitât e je di ducj; che o ai ator tancj di lôr che a àn ce insegnâmi e ce dâmi; che la spiritualitât no je negazion de umanitât di une persone, ma la sò umanitât che e cjamine cence mai fermâsi”.



ilfriuli@ilfriuli.it

## TEATRO INCERTO ‘Predis’ a Vençon cun musichis di Venier

Une comedie par une gnove vite sot di une buine stele. Cussì Glesie Furlane e invade il public a Vençon pe repliche di “Predis”, il spettacul dal Teatro Incerto cun musichis di **Glaucio Venier**, in sene domenie ai 23 di Març aes 4 dopomisdî tal auditorium des scuelis mediis.

La opare si vierç cuntun aforisme di Tagore che al devente simbul di dute la comedie “Ogni frut che al nas nus vise che Diu nol è in mòstuf dai oms”.



I atôrs dal Teatro Incerto

**Fabiano Fantini**, **Elvio Scruzzi** e **Claudio Moretti** a fasin omaç ai chei plevans che si cjatin a vivi bessôi lis lôr pigulis grandis bataiis, dismenteâts e sbeleâts di un mont che, come che al diseve **David Maria Turollo**, “nol perdona ai predis”. La jentrade e je libare.

## SCOLTADIS DI DRIUS

### Pari e mari mus

Mi displâs dilu, ma in dut el timp ch’o ài vivût in famée, no soi rivât a insegnâur nuje a gno pari e a me mari.



Euronews informa

# La Provincie e autorize gnûfs paiaments: une grande part e rivuarde i Comuns

La resinte assegnazion di bande de Resonarie centrâl dal Stât di spazis finanziariis in plui e permet ae Provincie di Udin di autorizâ gnûfs paiaments. Une part gruesse e rivuarde i Comuns. I 2 milions 848 euros concedûts dal Stât e dan une acelerazion aes oparis publichis (edilizie e viabilitât) gjestidis di Palaç Belgrât e a permetin al Ent di vê un margjin di manovre plui grant ancje par chel che al rivuarde altris cjapitui. La zonte provinciâl e à decidût di sfrutâ i spazis finanziariis concedûts dal Stât par sblocâ un prin pachet di determinazions di paiament fermis par vie dai vincui ae spese imponûts dal pat di stabilitât. “Cheste resinte assegnazion e permet di alçâ il limit

dai paiaments dai 6,4 milions proviodûts ai 9,2 milions atuâi pal prin semestri dal 2014 - al comentè Fontanini - limit che al reste ben al di sot dai normâi margjins operatîfs dal Ent. Dut cês si trate di un intervent che al permet di dâ flât a setôrs in crisi ma ancje un jutori ai Comuns che, cun chestis licuidazions a podaran, a lôr volte, riviodi i lôr paiaments”. Aes amministrazions comunâls a saran destinâts 624 mil euros: si trate di premis assegnâts di bande de Provincie di Udin in relacion aes prestazions de racuelte diferenziade e al numar dai abitants regjistrâts dai singui Comuns, premis che a concoraran a sostignî lis spesis par realizâ plaçai ecologicis e



acuistâ imprescj par rinfuarçâ la racuelte des scovacis (contignidôrs par cjarte, veri e vuelis vegetâi, bidons pal parte a parte, composter dumiesticis, racueidôrs stradai par pills e farmacs scjadûts). Risorsis a saran destinadis ancje ai gnûfs imprendidôrs: l’impurt di 145 mil euros, di fat, al vignarà licuidât tant che contribûts a sostegn des gnovis iniziativais imprendidoriâls. 133 mil euros, invezit, a saran destinâts aes associazions e privâts tant che contribûts pluriennâls par sostign investiments tai implants sportîfs e te edilizie scolastiche. 80 mil euros a vignaran doprâts dal Ent (Servizi istruzion) par comprâ furniments didactics. 46 mil euros a laran a un agriturisim par investiments in cont capitâl; altris fonts a saran destinâts aes parochiis par intervencs tes scuelis maternis. 200 mil 300 euros, tal ultin, a vignaran doprâts par saldâ prestazions profesionâls colegadis a oparis publichis realizadis.